



Majlis Ugama Islam Singapura

Khutbah Jumaat

7 Ogos 2015 / 22 Syawal 1436

Peranan Umat Islam Dalam Pembangunan

الْحَمْدُ لِلَّهِ الْمَلِكِ الْحَقِّ الْمُبِينِ الَّذِي أَبَانَ لِعِبَادِهِ مِنْ آيَاتِهِ مَا
بِهِ عِبْرَةٌ لِلْمُعْتَبِرِينَ وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ
لَهُ إِلَهَ الْأَوَّلِينَ وَالْآخِرِينَ وَأَشْهَدُ أَنَّ سَيِّدَنَا مُحَمَّدًا عَبْدُهُ
وَرَسُولُهُ الْمَبْعُوثُ رَحْمَةً لِّلْعَالَمِينَ. اللَّهُمَّ صَلِّ عَلَى سَيِّدِنَا
مُحَمَّدٍ وَعَلَى آلِهِ وَصَحْبِهِ وَسَلِّمْ تَسْلِيمًا كَثِيرًا . أَمَّا بَعْدُ فَيَا
عِبَادَ اللَّهِ اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

Sidang Jumaat yang saya muliakan,

Segala puji kita panjatkan kepada Allah s.w.t. di atas nikmat keimanan dan keamanan. Marilah kita pastikan agar kita memelihara ketakwaan kita kepada Allah. Semoga dengan berkat ketakwaan itu, Allah s.w.t. mengekalkan limpahan keberkatan dan keamanan dalam kehidupan ini.

Saudaraku,

Pada minggu-minggu yang lalu, kita telah diingatkan bahawa di antara ciri-ciri kerohanian yang kita dambakan adalah ia menjadikan kita seorang yang lebih yakin mengharungi cabaran

dunia moden serta menghasilkan kedamaian dalam diri. Ini akan membantu kita mengurus tekanan kehidupan dan memperbaiki hubungan kita sesama insan. Tambahan dari itu, kerohanian serta ketakwaan yang kukuh seharusnya menjadikan kita seorang yang berusaha ke arah pembangunan yang diinginkan agama: iaitu di peringkat individu, keluarga, masyarakat, serta negara.

Saudaraku,

Kita seharusnya bersyukur kerana hidup di dalam suasana yang membantu proses pembangunan sedemikian. Dengan suasana yang aman, stabil serta maju dalam pelbagai bidang, kita telah dapat membangunkan masyarakat, dan pada masa yang sama, menyumbang ke arah pembangunan negara.

Alhamdulillah, kita telah dapat membesarkan keluarga kita serta menjalankan kehidupan keagamaan kita dengan baik. Ini tidak bermakna kita tidak berhadapan dengan cabaran ataupun masalah. Tidak dinafikan, masih lagi terdapat banyak perkara yang perlu dipertingkatkan serta diusahakan bersama, agar kita melangkah lebih dekat kepada kecemerlangan hidup di dunia dan di akhirat. Namun, usaha ke arah kecemerlangan memerlukan hikmah, iaitu kebijaksanaan, di dalam mengatur langkah yang bakal meraih hasil yang positif lagi bermanfaat bagi seluruh masyarakat.

Seperti yang dibincangkan pada khutbah-khutbah yang lalu, masalah dan cabaran bukan sebab untuk melemahkan keyakinan kita atau melunturkan keislaman kita. Lihatlah kehidupan Rasulullah s.a.w., yang mana Baginda sendiri meskipun menghadapi tentangan hebat di Makkah, tidak terus ingin meninggalkan kota kelahirannya. Ketika meninggalkan kota Makkah, Nabi s.a.w. bersabda, seperti yang diriwayatkan oleh Imam At-Tirmidzi dan Ibnu Hibban dalam shahihnya: *“Tidak ada negara yang lebih baik dan aku cintai daripadamu (yakni Makkah), jika tidak kerana kaumku mengeluarkan aku daripadamu nescaya tidak akan aku tinggal di tempat lain selain kamu.”*

Inilah keyakinan mukmin yang teguh, yang tetap berusaha menonjolkan kebaikan melalui perbuatannya dengan hikmah dan berhemah, sehingga akhirnya orang menghargai kewujudannya dan menghormati pandangannya. Berbekalkan kerohanian yang teguh, kita yakin bahawa kita boleh terus menyumbang kepada keharmonian dan pembangunan berterusan negara kita, tanpa mengabaikan perintah Allah dan RasulNya s.a.w.

Terdapat dua prinsip yang dapat membantu kita mencapai matlamat sedemikian. Prinsip pertama dan utama adalah untuk melahirkan kesyukuran di atas nikmat ini dengan lebih banyak usaha dan amal kebajikan.

Imam Al-Ghazali pernah memberikan contoh yang indah tentang hakikat kesyukuran. Beliau menyatakan bahawa seorang yang benar-benar bersyukur ibarat orang yang apabila dikurniakan seekor kuda oleh rajanya beliau bukan hanya setakat bergembira kerana mendapat perhatian rajanya. Beliau kemudian bahkan menggunakan kuda itu untuk terus berkhidmat kepada rajanya demi mendapatkan tempat yang dekat dan istimewa di samping rajanya. Inilah hakikat kesyukuran, kata Imam Al-Ghazali. Iaitu apabila menerima nikmat daripada Allah, kita gunakannya untuk berkhidmat dan berbakti melakukan kebaikan, hingga akhirnya meraih keredhaan dan kasih sayang Allah s.w.t.

Contohnya, nikmat kesihatan digunakan untuk melakukan ibadah dan kebaikan. Nikmat harta dan bakat digunakan pula untuk membantu mereka yang memerlukan. Semua ini dengan harapan agar Allah sudi memandangi kita dan meninggikan darjat kita di sisiNya.

Prinsip yang kedua saudara, adalah untuk sentiasa memilih langkah yang terbaik, yang mengambil kira semua pertimbangan, apatah lagi di dalam konteks dan suasana yang sangat kompleks masakini. Pastinya, naluri manusia inginkan hasil yang segera, tetapi ini boleh menyebabkan kita memilih jalan yang terburu-buru. Namun, saudara sekalian, lumrah kehidupan ini adalah, setiap kejayaan tidak terhasil dengan usaha semalaman. Dan tidak ada jalan mudah dan ringkas

untuk mencapainya. Renungkanlah firman Allah s.w.t. di dalam Surah Fussilat ayat 34-35:

وَلَا تَسْتَوِ الْحَسَنَةُ وَلَا السَّيِّئَةُ ادْفَعْ بِالَّتِي هِيَ أَحْسَنُ فَإِذَا الَّذِي
بَيْنَكَ وَبَيْنَهُ عَدَاوَةٌ كَأَنَّهُ وَلِيٌّ حَمِيمٌ ﴿٣٤﴾ وَمَا يُلْقِنَهَا إِلَّا الَّذِينَ
صَبَرُوا وَمَا يُلْقِنَهَا إِلَّا لَذُو حَظٍّ عَظِيمٍ ﴿٣٥﴾

Yang bermaksud: *“Dan tidaklah sama perkara yang baik dan yang tidak baik. Tolaklah yang tidak baik itu dengan cara yang terbaik; maka (akan kamu dapati) orang yang dahulunya bermusuh dengan kamu menjadi seolah-olah kawan yang cukup karib. Dan hasil sedemikian tidak tercapai kecuali oleh mereka yang sabar dan mereka yang sangat beruntung.”*

Saudara sekalian, ingatlah panduan Allah s.w.t. ini di dalam mencapai kebaikan. Di dalam konteks hidup bermasyarakat, ini bermakna kita perlu meningkatkan kerjasama dan menggembeleng tenaga ke arah lebih banyak lagi kebaikan. Pastikanlah kita memanfaatkan nikmat keamanan dan kemakmuran hidup di Singapura untuk kita tingkatkan kerohanian dan keimanan. Manfaatkanlah suasana kedamaian ini untuk kita tonjolkan keindahan agama Islam dan pengikutnya, melalui pergaulan yang berakhlak dan semangat membantu segenap mereka yang memerlukan. Pastikan anak-anak kita terus maju melalui sistem pendidikan yang baik di negara kita ini, dan dapat membesar menjadi manusia yang membawa manfaat kepada semua berbekalkan kecemerlangan

dalam kerohanian serta kehidupannya. Begitulah cara kita mensyukuri nikmat Allah ini. Harapan kita adalah agar kita layak meraih pengampunan Allah s.w.t., seperti yang difirmankan di dalam Surah Saba ayat 15:

بَلَدَةٌ طَيِّبَةٌ وَرَبُّ غَفُورٌ ﴿١٥﴾

Yang bermaksud: “Negeri yang baik (aman dan makmur) dan (Tuhan kamu adalah) Tuhan Yang Maha Pengampun.”

Semoga dengan berkat keimanan dan ketakwaan kita yang melahirkan kebaikan bagi umat manusia, maka negara kita terus dikurniakan nikmat kemakmuran dan bukan sebaliknya, sesuai dengan firman Allah s.w.t. di dalam Surah Al-‘Araf ayat 96:

وَلَوْ أَنَّ أَهْلَ الْقُرَىٰءِ آمَنُوا وَاتَّقَوْا لَفَتَحْنَا عَلَيْهِم بَرَكَاتٍ مِّنَ السَّمَاءِ وَالْأَرْضِ وَلَٰكِن كَذَّبُوا فَأَخَذْنَاهُم بِمَا كَانُوا يَكْسِبُونَ ﴿٩٦﴾

Yang bermaksud: “Sekiranya penduduk negeri itu, beriman serta bertakwa, tentulah Kami akan bukakan untuk mereka (pintu) keberkatan yang melimpah-limpah, dari langit dan bumi. Tetapi mereka mendustakan (Rasul Kami), lalu Kami timpakan mereka dengan azab seksa disebabkan apa yang mereka telah usahakan.”

بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ
الْعَلِيمُ، أَقُولُ قَوْلِي هَذَا وَأَسْتَغْفِرُ اللهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا
فَوْزَ الْمُسْتَغْفِرِينَ وَيَا نَجَاةَ التَّائِبِينَ.